

Date – 15/12/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Chief Minister Pu Lalduhoma'n ram mipui tam zawk eizawna kuthnathawh anih avangin ram chawikan kawngah kuthnathawktute hnen thleng phak ngaihtuah a tul thu a sawi.
2. Lai Autonomous District Council inthlan neih zawh taka, party mal sorkarna siam thei an awmloh hnuah Zoram Peoples Movement leh Mizo National Front-te chuan sorkar intawm siam turin hma an la.
3. Mizoram Fire and Emergency Services chhinchhiah danin kumin chhungin Mizoramah in kang 27 a awm.
4. Prime Minister Narendra Modia chuan vawiin khan ram pathum Jordan, Ethiopia leh Oman tlawh turin a zin chhuak

<><><>

CM

Chief Minister Pu Lalduhoma'n ram mipui tam zawk eizawna kuthnathawh anih avangin ram chawikan kawngah kuthnathawktute thleng phak ngaihtuah a tul thu a sawi.

Vawiin khan National Bank for Agricultural & Rural Development (NABARD) Mizoram Regional Office chuan Assembly Conference Hall-ah State Credit Seminar 2026 - 27 an buatsaih a hmanpui na ah he thu hi a sawi a, Pu Lalduhoma chuan ram mipui zaa sawmruat deuh thaw chu lo neia eizawng annih avangin an dinhmun chawikan chu ram chawikanna a ni a ti a, kuthnawktute chawikan chuan ram hmasawna a thlen thei tih a sawi.

Chief Minister chuan hmalakna hrang hrang an neih zingah NABARD sum hmanga din Megawatt 10 pe chhuak thei Thenzawl Solar Power Plant chu an hawng thei tep tih sawiin Megawatt 5 pe chhuak thei dang Sumsuih ramah an thawk leh dawn a ti a. Chief Minister Rubber Missions pawh chak taka kalpui niin nikum chung khan Rubber kung nuaih li leh singnga an phun hman tih sawiin NITI Aayog Sustainable Development Index report thar bera an dinhmun a that avangin state ti tha pawl zingah an tel thei tih a sawi.

Chief Minister hian State Focus Paper 2026-27 a tlangzarh nghal a, NABARD kal tlangin sorkar chuan hmasawna hna tam tak a thawk thin a ti a. Ram hmasawna ke pen tichaktu pawimawh a ni tih a sawi baw.



UD&PA MINISTER

Tukin khan UD& PA Minister Pu K. Sapdanga chuan Aizawl Smart City Limited kaltlangin Aizawl Civil Hospital hnenah hnimhlum khawl Anesthesia Workstation ,cheng nuai 35.70 man leh mihring kawchhung enna Upper Gastrointestinal Video Endoscope Unit ,cheng nuai 22 man te a hlan.

UD & PA Minister chuan Health Department-a thawktute chu an indaih loh zia an hriatpui thu leh sawiselna leh demna an dawn chang pawh a lunghnur mai lova an hnathawh ropui zia bakah nunna hlutzia te leh inthlahdah zeuh pawl thui zia hre reng a, chhel taka, hmangaihna leh lainatna rilru nen missionary rilru pu a thawk zel tura a ngenin, damdawiina thawktute chu an thawhrimna leh inpumpekna pawh Aizawl Smart City Limited hotuten an hmuh reng bakah an tan kawng a inhawn viau thu a sawi bawk.

He hunah hian Health Minister Pi Lalrinpuii chuan Aizawl Smart City Limited in Civil Hospital-a khawl a pekte chu a taka a tangkaina an hmuh bakah, thawktute an phur hle thu a sawi a, Aizawl Smart City Limited kaltlanga MRI khawl hmangin June thla atangin damlo 1300 chuang en an nih tawh thu a sawi bawk.

UD&PA hian Smart City Limited kaltlangin Aizawl Civil Hospital hnenah cheng nuai 872 man MRI khawl leh khawl dang 24 avaiin cheng vaibelchhe 20.8 man kumin June thla khan a lo hlan tawh a ni.



LADC COLIATION

Lai Autonomous District Council inthlan neih zawh taka, party mal sorkarna siam thei an awmlah hnuah Zoram Peoples Movement leh Mizo National Front-te chuan sorkar intawm siam turin hma an la.

Party pahnihte thawh hona tur thuthlung a a lan danin, Lairam Legislature Party-ah hian party leader atan Pu T. Zakunga, ZPM party leader ni lai chu an pawm thu an tarlang a, a ni hi Chief Executive Member ni tura tih a ni a, Deputy CEM, Chairman leh Executive Member post pathum chu MNF legislature party lam chan tura tih a ni a, ZPM legislature party hian CEM bakah Executive Member post panga chang tura ruahmanna siam a ni bawk.

LADC sorkar thar tur Lairam Legislature Party-ah hian CEM, Deputy CEM, Chairman leh Executive Member post nilo MDC te tana post dang chelh theih chu CEM ni mai tur Pu T. Zakunga leh MNF legislature party te inbiak rawnna atanga hnawkhah mai tura tih a ni.

Lai Autonomous District Council neih zawh takah hian MDC 25 awmah MNF in MDC pariat, Congress Party-in pasarih, ZPM in paruk, BJP in pahnih bakah independent-a tling mi pahnih an awm bawk.



FIRE STATISTICS

Mizoram Fire and Emergency Services chhinchhiah danin kumin chhungin Mizoramah in kang 27 a awm.

Fire and Emergency Services hotuten Akashvani News Aizawl an hrilh danin, kumin chhunga kang meiin bungrua a tihchhiat zat hlutna chu, cheng nuai zali sawmnga pakua sing kua sang riat za nga leh sawmthum ang a chhut a ni a, kumin chhunga ram kang F&ES hnena report zat chu 162 a tling bawk.

Mizoram Fire and Emergency Services chuan kumin chhungin chhanchhuah hna tum 39 an thawk bawk a, hei bakah hian kumin chhunga kangmei avanga nunna chan mi pakat a awm thu an sawi bawk.

Kan correspondent report i lo ngaithla ang :

Voicecast

Mizoram Fire and Emergency Services hotute chuan mitin te kangmei laka fimkhur tur leh electric connection bakah gas connection put ru a awm leh awm loh chhung tinte enchiang thin tura an duh thu sawiin, ram lamah pawh ninhlei thiltih avanga hnah ro hal mai mai pawhin kangmei nasa tak a thlen theih thu an sawi a, hemi kawngah hian mitin te fimkhur tur leh kangmei chhuakin pawh nasa tak a thlen thin tih hria a, kangmei chhuak tur pumpleh na atan mitin te tan la tura an duh thu an sawi.



PHED MINISTER

PHED Minister Prof. Lalnilawma'n vawiin khan Jal Jeevan Mission hnuaiia thawh Tlungvel Multi Village (Tlungvel & Darlawng) WSS, Tuirini Grid pumping a hawng a, he hnathawh nan hian cheng nuai 1342.00 sen niin, he tui pump hi mi 5210 chawm thei tura ruahman a ni.

Tuirini Pump House complex-ah hawwna inkhawm buatsaih niin Prof. lalnilawma chuan Mizoram sawrkarin mipuite tui thianghlim hnianghnar zawk a pek a ngaipawimawh hle a ti a, tuihna humhalh turin hma an la mek tih sawiin tuihna tlem zel chu venhim a ngai tih sawiin ramngaw leh nungcha humhalh a pawimawh hle a ti a, hemi kawngah hian khawtlang mipuite nen tanrual a pawimawh thu a sawi.

Tlungvel leh Darlawng tuia chawmtu tur vawiin a hawn tak hi a project hming hi Tlungvel Multi Village Water Supply Scheme (Tlungvel & Darlawng) a ni.



SPORTS MINISTER

Sports Minister Pu Lalnghinglova Hmar chuan Mizoramin infiamna lama theihna sang tak a neih chu thawhona tha hmanga tih hmasawn ngei a nih tur thu a sawi.

He thu hi vawiina infiamna huang hrang hranga infiam mite zirtirna pe thintu coach-te intuaitharna atana Hawla Indoor Stadium, Republic Vengthlanga hun buatsaih a hawna hunah a sawi a. Sports Minister chuan Khawvel huapa infiamna lama mithiam leh zirtirtu tha Mizoramin pawisa sen ngai miah lova a thlawn a a chah chhuak thei chu lawmawm a tih thu leh infiamna discipline hrang hrang a infiam mite zirtirna pe thin coach te chu thahnem ngai taka inzir ngei turin a chah bawk.

Mizoram State Sports Council, Nippon Sports Science University leh JICA tang kawpin an buatsaih coach-te inzirnaah tura hun buatsaih ah hian zirtirtu atan sports discipline hrang hranga mithiam bik an lokal a, December 18 thleng zirtirna an pe ang.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



FCI MIZORAM

Food Corporation of India chuan Mizoram chhunga an kudam hrang hrangah buhfai metric tonn 21,269 hralh chhuah tur an kawl mek thu an sawi.

Mizoram a FCI hotuten Akashvani News Aizawl an hrilh danin, Mizoram chhung hmun hrang hrang a an kudam-ah buhfai chhek khawl dinhmun a that thu an sawi a, Aizawl kudam-ah buhfai metric tonn 3125. Kolasib kudam ah metric tonn 3933, Bualpui kudam-ah metric tonn 3213, Lunglei kudam-ah metric tonn 2444, Bairabi kudam-ah metric tonn 4769 bakah Lawngtlai kudam-ah metric tonn 2725 a awm mek thu an sawi.

Kan Correspondent report i lo ngaithla ang

Voicecast

Food Corporation of India Mizoram Divisional Manager Pu Bankim Phonglo chuan kumin sorkar tangka kum chhunga vawiin December ni 15 thlenga FCI in Mizoram a buhfai a lakuh zat chu metric tonn 77034.43 a tlin tawh thu leh hemi phurh luhna atan hian rail bungraw phurhna rake 39 lai hman a nih thu Akashvani News Aizawl a hrilh a ni.



MIZORAM STATISTICAL HANDBOOK 2025

Vawiin khan Chief Minister Conference Hall-ah Planning & Programme Implementation Department Commissioner & Secretary Pu Vanlaldina Fanai chuan Mizoram Statistical Handbook 2024 a tlangzarh a, Naktuk atangin Economics & Statistic Directorate, GE Branch-ah Rs. 100 in a lei theih ang.

Pu Vanlaldina Fanai chuan, Economics & Statistics Department-in Statistical Handbook 2024 tha tak mai, English leh Hindi-a buatsaih chu lawmawm atih thu sawiin Data dik leh rintlak neih chu hmasawna hnathawh kawng tinrengah a pawimawh tih sawiin Handbook chhuah loh kumah Abstract tihchhuah zel a nih avangin kum tinin data hi an update zel dawn a ti a, Data tha zawk leh kimchang zawk nei turin inpuahchah zel a tul thu a sawi.

Mizoram Statistical Handbook hi ram hruaitute leh sawrkar Department hrang hrangin ram hmasawna hna an thawhna kawngah leh, zirlai leh hna zawng mek te, research ti mek te, tourist leh mipui ten tangkai taka an hman atana buatsaih a ni thin a ni.



PM

Prime Minister Narendra Modia chuan vawiin khan ram pathum Jordan, Ethiopia leh Oman tlawh turin a zin chhuak a. A zin thawhkhatnaah hian Prime Minister Modia chuan vawiin chawhnu khan Jordan khawpui Amman a thleng a. Jordan lal King Abdullah II bin Al Hussein sawmna anga Jordan hi tlawh a ni a. A zinchhuah dawna a thuchhuah siamah Pu Modia chuan King Abdullah leh Jordan Prime Minister Jafar Hassan te a kawm tur thu a sawi a. Amman-a India mi chengte nen hun an hmang ho dawn bawk a ti a. Tun tuma Prime Minister Modia'n Jordan a tlawh hun hi India leh Jordan thawhdunna kum 75 na champha nen a innang chiah a ni.

Jordan a tlawh zawh hian PM Modia hian Ethiopia a pan leh dawn a. Ethiopia ram hruaitute nen India leh Ethiopia inkara thawhdunna hrang hrangte an sawidun dawn a. A hnukung berah Oman tlawh lehin Sultan Haitham ibn Tarik nen an inhmua ang a. Tun tum hi Oman leh India thawhdunna in kum 70 a tlinna tur chiah a ni bawk ang.

